


江山風月譜
衍波詞



江
山
風
月
詞
譜



衍

波

詞

孫蓀意
撰

中
華
書
局

叢書集成初編

江山風月譜（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

序

金荃蘭畹。大都閒麗之篇。芳草夕陽。不少銷凝之句。樂府之製。緣情以生。溯源騷楚。語不尙夫。倨奇。選律宮商。韻獨取其清越。雖一千餘調。才情之作爲多。而五百年來。閨閣之音尤雅。斷腸漱玉。旣響振於曩朝。海虞吳江。復譽聞於當代。是則詩人之餘事。實爲女士所專門。屈指近時。盱衡秀淑。若尊古發藻虞山。佩珊揚華歇浦。季湘朗潤。琴瑟之律一均。碧梧清新。異兌之爻競爽。其他四姓五陵之媛。不少六么三疊之傳。任長短而皆工。會句意於兩得。則衍波詞又其最焉。天邊問姓。盈盈水畔之人。花裏徵名。灼灼蓮中之的。胎瑤情於生小。地占湖山。馳鳳想於古今。家多載籍。朝霞作佩。錦繡隨其卷舒。明月爲胸。珠璣成於咳唾。芳辰待歲。早傳銘菊之辭。始卯有行。彌播頌椒之咏。紅絲一縷。倩冷月爲良媒。白玉交卮。羨洞仙之豔福。唱和之懷交。

暢聲律之講逾精。或鑪裊沉香。戀繡衾之殘夢。或牀閒斑管。拂鸞鏡之新妝。小別添吟。長箋寫憶。櫻桃花謝。緊簾外之春風。楊柳絲寒。瘦眉邊之秋影。芳情宛其繾綣。麗製申以纏綿。近聞紅藕之音。遠接玉田之響。縫雲嘯雪。方此爲難。豔樹衡棲。視茲蔑矣。僕粗聞爾指。未諳過宮。交獲中郎。因知道韜。才慚東海。敢序玉臺。用詒示夫閨人。亦傳觀於同調。瑤華坐對。聊私譜其芳香。妝閣晝閒。倘重煩於訶潤。嘉慶丁卯嘉平月二日。德清許宗彥序。

衍
波
詞

此 據 靈 鵜 閣 叢 書
本 排 印 初 編 各 叢
書 僅 有 此 本

衍波詞卷一

清 仁和孫蓀意秀芬_{一字玉撰}

蝶戀花

深掩重門春院靜。又是年時。一段消魂景。未過花朝春尙嫩。柳梢漸覺黃金褪。睡起髻鬟斜不整。注罷沉檀。火滅香篝冷。簾外櫻桃花落盡。晚來幾陣東風緊。

點絳脣

落花

滿院繁花。無端吹落隣家笛。風姨輕薄。不管人憐惜。斷紫零紅。補盡蒼苔缺。空愁絕。小鬟偷折。猶向枝頭覓。

蝶戀花

七夕

又見佳期逢七夕。烏鵲橋成。欲渡還嬌怯。一歲離情應更切。銀河執

手低低說。莫怪天孫腸斷絕。修到神仙。尚有生離別。風露悄涼人
寂寂。夜深獨向瑤堦立。
相見歡

嬌鶯啄響花鈴。夢頻驚。又是困人時節近清明。楊花白。梨花雪。正
新晴。睡起春風別院簾錢聲。
高陽臺

題李香君小影

曼臉勻紅。修蛾暈碧。內家粧束輕盈。長板橋頭。最憐歌管逢迎。無端
鼙鼓驚鴛夢。悵倉皇、雲鬢飄零。黯銷凝。舊院春風。芳草運生。桃花
扇子攜羅袖。問天涯何處。寄與多情。廿四樓空。白門明月淒清。江山
半壁成何事。但蒼茫、一片燕城。莫傷心。金粉南朝。猶賸娉婷。
百字令

次花海叔韻

清明近也。聽錫簫隔巷。吹來庭戶。初試羅衣風尚峭。小立曲欄凝佇。
柳學顰眉。花含笑靨。又見春如許。晝長人靜。畫梁新燕雙語。正值
輕暖輕寒。釀花天氣。一霎晴兼雨。對此韶光須痛飲。莫說閒愁閒緒。
三竺雲峯。六橋煙水。結伴嬉游去。藏雅門外。一枝搖漾柔櫓。
沁園春

美人風箏

翦楮裁筠。塗朱施粉。多情欲迷。但如飛一去。渾疑劍女。任吹不動。卻
笑環妃。細骨玲瓏。芳姿飄渺。奔月行常似弄妻。歡輒外。怪弓鞋一捻。
穩步雲梯。遙遙發上還低。最好在湖邊十里堤。怕巫神嬌妬。來行
雨濕。封姨輕薄。肯借風吹。飛燕身輕。驚鴻態逸。天際紅霞映舞衣。絲
兒斷。看綠珠墜也。倏下樓西。

點絳脣

冬夜不寐

閉卻紗窗。月兒斜透窗兒縫。夜深寒重。懶卸釵頭鳳。數盡更聲。底事難成夢。愁千種。慵拈新咏。只把燈花弄。

菩薩蠻

枝頭杜宇啼聲急。一簾絲雨和愁織。花事太匆匆。苔階飄落紅。晝長春繡懶。偏髻拖殘線。斜倚小屏山。含情憶去年。

如夢令

又見東風欲暮。陣陣撲簾飛絮。一夜替花愁。人在小樓聽雨。無緒。無緒。可奈匆匆。只得任他春去。

百字令

家邵庵叔花影吹笛圖

笛聲橫處。鶴南飛。裂石更穿雲表。花霧蒙蒙疎影淡。別有層樓深窈。
游楚閑情。桓伊清興。一曲超神妙。夜深人靜。蟾光林罅低照。凝想
按徵移宮。含商吐羽。逸響應繚繞。忽被東風吹散去。空際餘音猶袅。
幾點遙山。半溪流水。花外鶯聲曉。披圖神爽。攜尊來此聽好。
菩薩蠻

繡毬花

叢叢晴雪闌干曲。東風碎翦玲瓏玉。蝴蝶打成團。梅花一帶攢。昨
宵林影白。錯認團團月。曉起捲簾看。羅衣生薄寒。
探春慢

蔣葆存學博蔣村草堂圖

山鎖空青。溪圍寒碧。幽棲近臨河渚。黃葉孤村。夕陽喬木。指點故園
非誤。流水疎籬外。更繞屋。梅花千樹。想當把酒豪吟。暗香吹上詩句。

桑梓廿年心事。看三徑依稀。畫圖開處。清簾橫琴。高樓弄笛。消得幽懷如許。何限閒風月。儘分付。沙邊鷗鷺。憑仗生綃。臥游障子描取。柳梢青

青梅

細雨闌珊。江城四月。猶賸餘寒。青粉牆頭。綠陰枝上。一點如丸。拈來箇箇勻圓。心怯處。盈盈味酸。笑蹙雙蛾。畫闌斜倚。纖手輕搏。翠樓吟

秋柳

瑟瑟疎疎。濛濛澹澹。斜陽畫出秋影。自鴛聲啼老。渾不是。鏡中眉暈。愁春夢醒。賸咽露涼蟬。抱枝淒緊。憑誰認。風流張緒。當年姿韻。重省。嘗記年時。向灞橋驛岸。殷勤折贈。章臺人去遠。料近日。楚腰消損。西風光景。看憔悴如斯。那禁離恨。長堤外。晚烟如雨。歸鴉成陣。

清平樂

夜宴

金樽瑤席。羅袖如雲列。堂上笙歌歡未徹。閒煞玉堦明月。
舞餘蟬
鬢惺鬆。當筵唱罷玲瓏。酒醒畫屏人去。燭花猶闌春紅。

念奴嬌

東洋美人圖

風鬟霧鬢。記斷腸詩句。蔡郎曾賦。試向畫圖重省識。別是消魂眉黛。
衣曳鮫綃。釵橫玳瑁。巧樣看梳裏。龜茲唱罷。背人小立無語。遙想
弱水東頭。三山宛在。定有神仙侶。玉雪雙趺高躡展。壓倒南朝蓮步。
雲海微茫。蓬萊縹緲。空惹愁千縷。真真須喚。彩雲莫共飛去。
水調歌頭

登六和塔

到眼忽金碧。塔影挂晴空。問誰爲此罕堵。卓筆寫蒼穹。最好憑闌長望。隔岸越山如笑。揖我白雲中。城郭渺茫際。鈴語墮天風。登臨興。懷古意。兩何窮。是處江山洵美。韶景惜匆匆。莫話錢王舊事。惟有無情潮水。日夜自流東。欲去更回首。落日一江紅。

羅敷媚

玉堦誰種梧桐樹。風也零星。雨也零星。作去得愁人不要聽。病來心緒難消遣。怕也伶俜。爭不伶俜。如此淒涼幾慣經。

洞仙歌

簷吟軒十姊妹花盛開。席上作。

清明過後。漸愁春懷抱。小白鶯紅故相惱。正梨雲墜粉。桃雨霏香。纔開處。又被蝶喧蜂鬧。芳名呼姊妹。絕似嬋娟。顧影相憐惜嬌小。最好是輕陰。作去。暖烘晴。更添得。晚來斜照。且莫負東風賞花期。便百

罰深杯也須判了。

邁陂塘

題薛可菴蓮景圖

渺臨流。翩然一葉。載將涼意如許。湖波十里澄於鏡。翠蓋亭亭無數。須小住。怕狼藉紅衣。魚浪吹香去。嫣然欲語。正曉雨初收。清風徐拂。掉入最深處。漫容與。何必尋盟鷗鷺。攜來弄玉佳侶。冰紗霧縠清無暑。恰稱淩波微步。看屢誤。試照影明流。人與花同嫵。新詞待譜。更添寫雙鬟。橫吹短笛。唱徹闌紅句。

瑞鶴仙

水仙花

芳姿矜素質。倚輕寒亭亭。倩影玉立。羅衣翠綃織。但黃侵宮額。粉塗檀頰。簾飛細雪。對屏山。惱情脈脈。憶開時。嘗是殘年。未許蝶尋蜂覓。

高格。雙管描香。孤絃寫韻。稱伊清絕。淩波步淺。涼露溼生塵襪。論
丰標。替弟梅兄怎比。別是珊珊仙骨。記瑤臺。月底歸來。黃冠半側。
青玉案

余慈柏廣文秋江獨釣圖

烟波萬頃秋無際。一葉扁舟搖曳。自把漁竿淩渺瀟。綠簑青箬。浮家
泛宅。合號元真子。鷗盟鷺約何須計。西風起。鱸魚正美。釣罷船頭
還獨醉。荻花無數。斷鴻幾點。江色蒼茫裏。
喝火令

題許玉年茂才亡室照

明慧同徐淑。才華似大家。春風容易落曇花。試問歡期幾許。屈指半
年餘。妙倩傳神手。描來萼綠華。生綃依舊臉如霞。比似年時。略瘦
一些些。比似年時。初見無語翠鬟斜。